

佛說八大人覺經講義  
般若波羅密多心經講義  
觀世音菩薩普門品講義  
法華經弘傳序講義  
佛說盂蘭盆經講義

2006/10/24

佛說盂蘭盆經傳義



## 回向偈

愿以此功德  
庄严佛净土  
上报四重恩  
下济三途苦  
若有见闻者  
悉发菩提心  
尽此一报身  
同生极乐国

圆瑛法汇丛书 三

佛说八大人觉经讲义  
般若波罗密多心经讲义  
观世音菩萨普门品讲义  
法华经弘传序讲义  
佛说孟兰盆经讲义

印赠者 北京广济寺

赠送处 北京广济寺

地址 北京西四阜内大街二十五号  
公元一九九九年二月

内部资料 免费交流

准印证号 九八—〇三一三

印数 五千册

佛說盂蘭盆經

西晉三藏竺法護譯

聞如是。一時佛在舍衛國祇樹給孤獨園。大目犍連始得六通。欲度父母。報乳哺之恩。卽以道眼觀視世間。見其亡母。生餓鬼中。不見飲食。皮骨連立。目連悲哀。卽以鉢盛飯。往餉其母。母得鉢飯。便以左手障鉢。右手搏食。食未入口。化成火炭。遂不得食。目連大叫悲號。涕泣馳還白佛。具陳如此。佛言。汝母罪根深結。非汝一人力所奈何。汝雖孝順。聲動天地。天神地祇。邪魔外道。道士四天王神。亦不能奈何。當須十方衆僧威神之力。乃得解脫。吾今當說救濟之法。令一切難皆離憂苦。佛告目連。十方衆僧。七月十五日。僧自恣時。當爲七世父母。及現在父母。厄難中者。具飯百味五果。汲灌盆器。香油錠燭。牀敷臥具。盡世甘美。以著盆中。供養十方大德衆僧。當此

之日。一切聖衆。或在山間禪定。或得四道果。或在樹下經行。或六通自在。教化聲聞緣覺。或十地菩薩大人。權現比丘。在大衆中。皆同一心。受鉢和羅飯。具清淨戒。聖衆之道。其德汪洋。其有供養此等自恣僧者。現世父母六親眷屬。得出三塗之苦。應時解脫。衣食自然。若父母現在者。福樂百年。若七世父母生天。自在化生。入天華光。時佛敕十方衆僧。皆先爲施主家咒願。願七世父母。行禪定意。然後受食。初受食時。先安在佛前。塔寺中佛前。衆僧咒願竟。便自受食。時目連比丘。及大菩薩衆。皆大歡喜。目連悲啼泣聲。釋然除滅。時目連母。卽於是日。得脫一劫餓鬼之苦。目連復白佛言。弟子所生母。得蒙三寶功德之力。衆僧威神之力。故若未來世。一切佛弟子。亦應奉孟蘭盆。救度現在父母。乃至七世父母。可爲爾不。佛

言。大善。快問。我正欲說。汝今復問。善男子。若比丘比丘尼。國王太子。大臣宰相。三公百官。萬民庶人。行慈孝者。皆應先爲所生現在父母。過去七世父母。於七月十五日。佛歡喜日。僧自恣日。以百味飯食。安盂蘭盆中。施十方自恣僧。願使現在父母。壽命百年無病。無一切苦惱之患。乃至七世父母。離餓鬼苦。生人天中。福樂無極。是佛弟子修孝順者。應念念中常憶父母。乃至七世父母。年年七月十五日。常以孝慈。憶所生父母。爲作盂蘭盆。施佛及僧。以報父母長養慈愛之恩。若一切佛弟子。應當奉持是法。時目連比丘。四輩弟子。歡喜奉行。

報父母恩咒——

南無密栗多哆，婆曳娑訶。

讚——

神通尊者，滿鉢呈親，食纔入口火炎身，號

泣莫能伸，聖教敷陳，享薦伏慈尊。

# 上蘭盆供

孟蘭會啓 普度門開 恭迎三寶降臨來 一一坐花臺 唯願慈哀 受我妙香齋

南無齋供養菩薩摩訶薩三遍

南無常住十方佛 南無常住十方法 南無常住十方僧 南無本師釋迦牟尼佛 南

無藥師琉璃光佛 南無當來下生彌勒尊佛 南無過去覺花定自在王佛 南無清淨

蓮華目佛 南無多寶如來 南無寶勝如來 南無妙色身如來 南無廣博身如來

南無離怖畏如來 南無甘露王如來 南無阿彌陀如來 南無世間廣大威德自在光

明如來 南無佛說盂蘭盆經 南無大願地藏王菩薩 南無大悲觀世音菩薩 南無

護法諸天菩薩 南無伽藍聖眾菩薩 南無歷代祖師菩薩 南無蘭盆會上佛菩薩

南無古往自恣緣覺聲聞僧 南無大孝目犍連尊者 南無三界聖凡幽顯尊神三遍

南無薩嚩怛他誒哆 嚩嚩枳帝 唵 三跋囉三跋囉吽二十一遍

南無蘇嚩婆耶 怛他誒哆耶 怛姪他 唵 蘇嚩蘇嚩 鉢囉蘇嚩鉢囉蘇嚩 娑婆

訶七遍

此食色香味 上供十方佛 中供諸聖賢 下及六道品 等施無差別 隨願皆飽滿

令今施者得 無量波羅密 三德六味 供佛及僧 法界有情 普同供養一遍

唵誒誒曩 三婆縛 鞞日囉斛三遍

五果百味 香色清新 自恣會上獻能仁 願親出沉淪 普濟幽冥 沙界布陽春

南無普供養菩薩摩訶薩三遍

以此蘭盆供善根 報答父母劬勞恩 存者福樂壽無疆 亡者離苦得超昇

四生九有諸含識 八難三途苦眾生 各各悔過洗瑕疵 盡蒙慈濟出沉淪

## 自序

夫寄跡塵寰。鑄形父母。懷胎十月。乳哺三年。嚙苦吐甘。誰無劬勞之德。移乾就濕。曷禁罔極之恩。古人有言曰。百行孝爲先。立身孝爲本。誠哉是言乎。嘗聞於人曰。釋氏割愛辭親。毀形脫俗。斯誠不孝之徒。罪何可道。余曰。子祇知其孝之小者。而不知其孝之大也。舉世皆然。何怪於子。以其但知今生父母。而不悉累生父母。今生父母。理宜盡孝。累世父母。可不行孝乎。然累世親緣。改形易報。未了生死。不出輪迴。我等既無宿命之通。何由得識人間天上。此界他方。出沒萬端。升沉片刻。俄焉而天。俄焉而人。俄焉而修羅畜生。俄焉而餓鬼地獄。彼其呼號痛苦。宛轉饑虛。我雖不見不聞。彼必求拯求救。其或鞭撻出血。誰知吾母之悲。牽豕就屠。焉識乃翁之痛。而釋氏之出家修道。朝暮課誦。拔濟三途。茹素終身。不忍殺食。若有道行。能令慈親。了生脫死。離苦得樂。四恩總報。三有均資。其爲孝也大。彼徒知甘旨之供。口體之養。其爲孝也小。如我佛釋迦牟尼。爲太子時。因觀我及衆生。老病死苦。無法解決。一日於北花園晏坐。忽有淨居天人。化現比丘。圓頂赤足。身披袈裟。手持錫杖。從太子前徐步而過。威儀濟濟。道貌雍雍。太子見而異之。問曰。子爲誰。所修何行。答曰。我乃比丘。修出離生老病死苦之行。太子心喜。欲請示修法。時比丘振錫騰空而去。太子



遂立志出家修道。夜半逾城。青山斷髮。棄捨金輪王位。現作比丘。脫珍御之服。著弊垢之衣。五載參方。六年苦行。時節既至。佛道堪成。故於臘八。夜觀明星。忽然悟道。世出世法。靡不了知。悟明生老病死。原由愛欲而生。因愛生欲。因欲受身。有身則老病死苦相續不斷。捨生趣生。窮劫莫脫。故佛制比丘。嚴持禁戒。心身不姪。斷除貪欲。苦因既斷。苦果自無。此身不有。則老病死苦不離而自離矣。本利生之弘願。以先覺覺後覺。說法四十九年。度生無量數衆。爲報親恩。上昇忉利。爲母說法。令獲勝益。豈僅今世親恩得報。卽累世父母之恩。咸蒙報答矣。夫此出家者。詎非其爲孝也大矣哉。綜觀我佛。一生事跡。唯以大覺利生。犧牲一己之富貴利樂。以身作則。不貪王位。不執家庭。化小我而成大我。天下爲公。捨苦因。令種樂因。平等解脫。其心理革命之偉大精神。報答親恩之無上大孝。非佛陀者。其誰能爲之乎。圓瑛五齡椿萱失蔭。幼業儒。冠學佛。先習禪宗八載。次復研究教乘。三十一歲開座講經。思親恩之難報。羨大孝如日連。是以欲追先哲。略盡孝思。常於每年七月十四十五十六日。佛歡喜日。僧自恣時。宣講盂蘭盆經。勸修蘭盆妙供。集衆諷誦經文。仰仗佛僧之威神。俾令親恩而度脫。今特編輯。是經講義。藉茲文字。提倡孝思。所願見聞隨喜。共修孝行於今生。信解受持。同報親恩於後世。更望翻印流通。以廣法施。是爲序。

中華民國三十八年六月十九日圓瑛弘悟序於圓明講堂

# 佛說盂蘭盆經講義

上海圓明講堂圓瑛弘悟著

今講此經。略開七門。一總釋經題。二啓教因緣。三蕤乘所攝。四辨定宗旨。五顯明力用。六前後三譯。七講解文義。

## 甲一總釋經題

題爲經中之總綱。經是題中之別義。總綱若明。別義自易了解。如提綱。則綱目自張。揭領。則衣襟自直。故今先釋經題。佛是能說之人。盂蘭盆是所說之法。此五字是別題。與諸經之名。差別不同。故下經字是通題。經藏諸部。通名爲經。故是題中。有人法通別二對。須先知之。次講題中之義。

佛稱能說之人。以佛非天生自然之佛。乃是人道修成之佛。一切衆生。本來是佛。祇因迷昧。而爲衆生。若能返迷歸悟。從本覺理。起始覺智。覺至心源。究竟清淨。卽名成佛。佛者覺也。乃是大覺悟之人。

佛乃三覺圓滿。方得稱佛。一自覺。覺悟心卽是佛。寂湛常恆。靈明洞徹。故二覺他。覺悟

一切衆生。返妄歸真。信解修證。故三覺滿。惑淨智圓。自覺智滿。則慧足。經三祇劫。覺他行滿。則福足。三覺圓。萬德具。兩足尊。乃稱爲佛。今說此經之佛。是釋迦牟尼佛。果上說法利生也。

說者宣說。佛以八音四辯。觀機施教。對衆宣揚。欲啓大衆之孝心也。

孟蘭是印度之語。此譯倒懸。盆乃華夏之音。是爲供器。七月十四、十五、十六。僧自恣日。佛令盆羅百味。奉供三尊。仗聖衆之威神。拔餓鬼之痛苦。如救倒懸之急。卽以是義而立經題。

經者梵語修多羅。此云契經。謂契理契機之教。上契諸佛所說之理。下契衆生可度之機。此方聖教。亦稱爲經。本經卽佛門之孝經也。上通別合解。一總釋經題竟。

### 甲二啓教因緣

法不孤起。起必有因。不有因緣。無由垂範。我佛欲啓發人道孝心。乃因大目犍連。爲報親恩。出家修道。始得六通。觀見亡母。墮餓鬼中。自力不能救母倒懸。馳還白佛。求佛教度。故爲說修設孟蘭盆供。可以救度。七世父母。大目犍連。由孝其親。欲利一切。故與道俗弟子。請佛留此法門。爲此經發起之因緣。二啓教因緣竟。

甲三藏乘所攝。

因緣既明。未知藏乘。何所攝屬。藏有三藏。一修多羅即經藏。此云契經。乃因機設教。猶如對症施方。教必契機。多詮定學。故經為定學之藏。二毘奈耶即律藏。此云調伏。調謂調練三業。伏謂制伏過非。律為戒學之藏。三阿毘曇即論藏。此云對法。法謂涅槃四諦。能對即無漏觀慧。論為慧學之藏。

此經佛說教倒懸之法。即契機之教。屬經藏所攝。若約宣揚孝道。屬律藏所攝。律詮德行。孝為百行之源。儒教孝經。開宗明義。章中標為至德要道。而我佛初成正覺。演大華嚴。繼說梵網。初結菩薩波羅提木叉。大乘戒法孝順父母師僧三寶。孝順至道之法。與孔聖德要道、若合符節、若孝名為戒。故亦屬律藏所攝。

乘有五乘。一人天乘。修五戒十善法。二聲聞乘。修四諦法。苦集滅道、厭苦斷集、慕滅修道、是也三緣覺乘。觀察十二因緣法。流轉門、惑、業、苦、三世因果、遷流輪轉、生死不息、還滅門、還復真諦、滅除生死四菩薩乘。修六度法。布施度慳貪。持戒度諸惡。忍辱度瞋恨。精進度懈怠。禪定度散亂。智慧度愚癡。以此六法。自度度人。五佛乘。修一心之法。圓悟萬法。不出一心。心生萬法。萬法唯心。證此一心。成無上道。本經孝順父母。似惟屬人乘所攝。若約孝順多生父母。以及自行化他。同修孝道。廣報

親恩亦屬菩薩攝。三藏乘所攝竟。

甲四辨定宗旨

藏乘攝屬既定。未識何爲宗旨。此經以孝順報恩爲宗旨。孝爲人生之大本。哀哀父母。生我劬勞。罔極深恩。理宜報答。人若不孝。則爲忘本。君子務本。本立而道生。故孝冠百行之先。

涅槃經云。奇哉父母。生育我等。受大苦惱。滿足十月。懷抱我身。既生之後。推乾就溼。除去不淨。大小便利。乳哺長養。將護我身。以是義故。當須報恩。隨順供養。

孝順報恩。乃爲二事。如孟宗哭竹生筍。雖爲孝順。但能養口體。卽此未必可爲報恩。爲人子者。父母生前。既能養其口體。復能養其心志。可稱孝順。父母死後。復能度其神識。方是報恩。如地藏菩薩前身之爲婆羅門女。能度親靈。脫離苦趣。是爲孝順報恩。四辨定宗旨竟。

甲五顯明力用

宗旨已定。未審有何力用。力者功力。用者德用。力用卽功德之別稱。本經佛說僧自恣日。令設孟蘭盆供。奉供三尊。聖衆之道。其德汪洋。仗其威光道力。可以超度七世父母。

六親眷屬。脫惡趣之沉淪。解倒懸之痛苦。如大目犍連。依教修齋。能救生母。脫餓鬼之飢虛。卽生善道。其力用。豈思議之所能及哉。五顯明力用竟。

甲六前後三譯

此經共有三譯。一晉武帝時。刹法師所譯。名盂蘭盆經。二惠帝時。法炬法師譯云灌臘經。取文中。具飯百味五果。汲灌盆器等意。以立其名。三舊本別錄。又一師譯爲報恩經。此約所行之行以立名。三經重沓。時所宗尙。多弘初譯。今所講解。卽刹法師譯本。六三譯前後竟。

甲七別解文義分三 乙初序分 二正宗分 三通流分。此三分之分。始於道安

法師。證於親光菩薩佛地論。初教起因緣分。二聖教所說分。三信受奉行分。彌天

高判。冥符西域。今古同遵。序分分二。丙初證信序 二發起序。今初證信序、具足信、

聞如是。一時佛在舍衛國祇樹給孤獨園。

此卽六成就中前五。諸經皆云。如是我聞。一時佛在某處。與若干大衆俱。六緣具足。大

教當宣成就法益。故云成就。通於諸經皆有。又稱通序。諸經皆如是在先。聞則次之。此經以聞在先者。乃隨譯人意耳。今經闕一列衆。義必有之。是文之略也。觀後流通分末云。時目連比丘。四輩弟子。歡喜奉行。可證六緣成就。

又名經後序。是結集者。依佛囑所安。佛臨涅槃。阿難悲哀痛哭。阿那律陀。謂阿難言。汝是持佛法人。當以大事問佛。哭將何用。乃教問四事。一佛滅後。我等依何而住。答依四念處住。念是能觀之智。處是所觀之境。一觀身不淨。二觀受是苦。三觀心無常。四觀法無我。是依法住。二佛滅後。我等依誰爲師。答依戒爲

師。三惡性比丘。如何治之。答默而擯之。四結集經時。一切經首。當安何語。答如是我聞。一時佛在某處。與若干大衆俱。此是佛意命安。故諸經皆有。

聞。卽阿難由耳根發耳識。親聞如來面命耳提。一堂授受。非輾轉傳聞也。世人都說肉耳能聞。不知肉耳是色法。色法則不能聞。若此耳能聞。則人死耳根猶存。何以不聞。眼根等亦復如是。必定耳識與根性。方能有聞。此卽聞成就。

如是指法之辭。卽指此一卷孟蘭盆經。孝順報恩之法。是事可信。故云如是。此卽信成就。又阿難結集之時。大衆要求云。如尊者所聞。當如是說。阿難答云。如是當說。如我所聞。故曰聞如是。

一時者、不有良時。安成嘉會。卽師資道合。一堂晤對。說聽終竟。謂之一時。此卽時成就。佛在。佛卽娑婆教主。釋迦牟尼佛。佛有三身。一法身佛。法身清淨。猶若虛空。無在無所。不在。二報身佛。住蓮華藏世界。爲諸菩薩。說大乘法。三應身佛。乃應機示現之身。住凡聖同居土。爲說法主。此卽主成就。

舍衛國。乃憍薩羅國都城之名。卽波斯匿王所都。因有南憍薩羅國同名。故匿王以舍衛爲國名。以簡別之。梵語舍衛。此譯豐德。國中富有財寶。五欲色聲香味觸五塵欲境勝熾盛。人多多聞解脫之者。有解豐德之名。謂國豐四德。余以爲多聞解脫。可以稱德。而財寶五欲。不足以德稱。故將豐德。分而釋之。以國有財寶五欲之豐。人有多聞解脫之德。

祇樹給孤獨園者。祇是祇陀太子。樹卽太子所施之樹。給孤獨。乃須達多長者之善名。長者爲匿王大臣。財富無量。好行惠施。常以財物。周給孤獨。幼而無父曰孤。老而無子曰獨。故人稱爲給孤獨長者。以金磚布地。買太子花園。起建講堂精舍。供養佛僧。德感太子。共施園樹。故俱留名。此卽處成就。

衆成就。文雖略而義必具。前已舉流通分爲證。六緣具足成就。初證信序竟。

丙二發起序。亦名別序。與諸經發起因緣。各別不同故。又稱經前序。乃說經之前。由



此因緣故。分爲四科。一得通報恩。二乘通覓母。三悲墮救濟。四難轉定業。今初。

## 大目犍連。始得六通。

大目犍連。此云大采菽氏。姓也。以其先世祖宗。入山修道。常以菽荳爲食。菽卽荳也。然後得道。因是命族。其族出家者多人。大目犍連神通第一。加大字以別其餘也。本名拘律陀。是樹名。父母禱此樹而生。故卽以樹爲名。是王舍城宰輔之子。先從沙然梵志學道。與舍利弗爲師兄弟。沙然去世。聞佛因緣之教。悟明佛法。同舍利。隨佛出家。目連本爲欲報親恩。出家修道。依四諦法。斷惑證真。成阿羅漢。

始得六通者。破我執。證我空。卽得六種神通。此是修得通。非同天及鬼神之報得通。羅漢多一漏盡通。故能了生死。出三界。所以異於報得五通。亦復超勝。一天眼通。能見遠近諸色。不獨觀障內之色。乃至牆壁大山。皆不能爲障。悉皆澈見。二天耳通。上窮有頂之天。下極風輪之際。一切諸聲。悉皆得聞。三他心通。一切他人心念。或定或散。有漏無漏。悉皆得知。四宿命通。能知宿世。受報好醜。善惡業緣等事。五神足通。亦名如意通無論遠